

Nr. 8 (242)
Ч. 8 (242)

Lwów, czwartek dnia 2 marca (17) 1939
Львов, четверг дня 2 марта (17) 1939

Rok VI.
Рок VI.



Орган Лемковского Союза
ŁEMKO, organ Łemkowskiego Sojuza

Выходит в каждый четверг.

Wychodzi w każdy czwartek.

Редакция и администрация в Крыниці. — Адрес „Лемко“ Крыница.
Redakcja i administracja w Krynicy. — Adres „Łemko“ Krynica.

Пренумерата в краю:
30 грошей місячно,
80 „ квартално,
1.50 „ полрочно,
3 зл. рочно.
В Америкі: 1 дол. рочно.
В Чехословаччині:
2 кор. місячно, 10 кор. полрочно,
20 кор. рочно.
Ціны оголошень:
Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.
оголошення малы за 1 мм. 20 гр.
в тексті 30 гр., перед текстом 40 гр. При місячном и долшом оголошеню значна зniżка.
Контото чековое Нр. 404.155.

Посол Полков. Цсадек в обороні русинов.

В выберательном окрузі Сянок выбрано послом на Сейм полковника - легионера Цсадека. На него голосовали не лем полякы, але также и руске население пол. сяноцкого и кросянского, прото тыж полк. Цсадек уважат себе за депутата, репрезентуючого так поляков як и руснаков.

При ухваленю бюджета посол полк. Цсадек забрал голос и заявил, што на основі статыстыкы в воеводствах полуднево-всходных находит ся около 3 милионы поляков, 400.000 жидов, 1,675.000 украинцов и 1,139.000 русинов, што доказуе, же русины с полным основанием могут ділити с украинцами право репрезентувати в том краю славянске меньшинство. Операючи ся на том, же полк. Цсадек ест выбранный в Сейм великим количеством русских голосов, он объявил от имени руского населения о лояльности, любви и згоди русинов с поляками, а также привязаности до Польской Державы.

Заявлене Полк. Цсадека помістили многы польскы газеты, а „Вечер Варшавскій“, зазета, котру читат в Польщі найбільше людей, высказуе ся о том заявленю так:

„Мы можеме с радостью и признанием поватати новый курс политики в воеводствах: львовском, тарнопольском и станиславском.

От часу отрождения Польщи аж до тепер вела ся там односторонна політыка глядана угоды с украинцами и непризнавания русинов. Аж тепер показало ся, же в tych воеводствах же понад миллион славян, котрых нич не лучит с украинцами и котры желают мати возможность вдоволити свои культурны и экономичны потребности, годячи их с лояльным отношением до Державы.

Дальше автор наводит аргументы, рідко появляючи ся в польских газетах.

„Русины не являют ся на той землі чим то новым, як нпр. украинцы. Украинизм был утвореный штучно віденским правительством, австрийским генеральным штабом, гдеякыма галицкыма політыками с Михаилом Боб-

ржинским на челі и в особенности метрополитом Шептыцкым. Украинизм мал быти тараном против царской России, а тепер перемирил ся в мину под всходном границом Польщи. Помимо того польске правительство все поддерживало украинизм, поминаючи цілковито жадания русинов. До войны очи русином были звернены на Россию, але от часу большевицкой революции русины, народ уміренный, спокойный и привязанный до своей религии, порвали со своим давным москальфильством и тым самым перестали быти небезпечны для Польской Державы, в котрой видят тепер свою одыноку опору.

Здае ся, же выступлене полк. Цсадека выповіло не лем его симпатии и взгляды, яко посла, выбраного в окрузі также лемковскыма голосами, але официальне признане русино вест ділом, отвѣчающим интересам польской державности. Русины не жадают много. Они хотят лем мати равны права экономичны и политичны с украинцами.

Першим кроком — пише дальше „Вечер варшавскій“ — повинно быти отдане русинам „Народного Дома“ во Львові, в котром находит ся численны организации основаны русинами ище до войны. Австрийске правительство отобрало „Народный Дом“ русинам и назначило комисара. Польске правительство не отмінило того зарядження, причом до заряду допущено безправно украинцов. Тото треба якнайскорше змінити. Нехай русины достанут возможность трудити в культурной и экономичной областях, нехай соперничают они с украинцами, на што мають полне право и што обезпечат им констытуция.

Польска общественность — кончит автор статі — не все добре ориентиует ся в взаимных отношениях рижных народностей, живущих на всхокных землях, але оно повинно запамятати собі добре выступлене полк. Цсадека и ждати проявления послѣдствий в активной політыці Правительства“.

—X—

Война в Испании закончит ся за 2-3 тыждней.

Льондонскы політычны круги твердят на основі информации с Парыжа и Испании, же домова война буде зликвидована в найблизших двох до трех неділь.

Газеты доносят, же ген. Франко по передаче начальства национального правительства своему швагрови, министрови Суннерови, завозвал республиканске правительство до заперестания борбы и до поддана ся без яких-нибудь условий. Одновременно выдал он до населения апель, штобы перестано слухати правительство Негрина.

Если Негрин не вдоволит того жадания, в тако мзарі ген. Франко приступит до дальших атак на всіх фронтах. Атаки будут так

сильны, яких не было ище в той войні. Одновременно буде ся атаквати от стороны моря, на всіх сухопытных фронтах и самолетами. Такой сильный удар потрафит переломити силу противника в пару дней.

Газеты доносят также, же президент республиканской Испании, Азана, котрый мие тепер в Парыжі, зажадал от Негрина капитуляции и загрозил, же если Негрин не поддаст ся, то он усуне его и других министров с уряду и сам также зложит свой уряд.

Таким способом республиканска Испания не мала бы ниякой констытуцийной власти, што приспѣшит также конец войны и признане через всіх правительства ген. Франко.

Выборы на Прикарпатской Руси.

Дня 12. лютого отбыли ся на Прикарп. Руси выборы до карпатского сейма. Выборы тоты сут доказом небывалого насилия и гнета над руским населением краю. В многих місцевостях доходило до поважного столкновения меже населением, ческыма жандармами и січовиками.

В місцевости Страбичево жандармы буквально кольбами заганыли людей до хаты, где отбывали ся выборы. Огорчене таким поведением населеніе шмарило ся на жандармов и гдекотрых сильно потурбовало.

В Добробратові люде зажадали, штобы до выберательной комиссии вошли также представителі Добробратова Волошинцы спротивили ся тому и люде ворвали ся до школы, где мали отбыти ся выборы, вышмарили со школы цілу комиссию и потурбовали пару волошинцов. Помимо того, же в селі том не отбыли ся выборы, урядово подано, же в селі том всі голосовали на листу Волошина.

По выборах по многих селах дошло до кривавых столкновень меже людьми и волошинцами.

С Мукачева доносят о слідующих результатах выборов:

В Гандеровицах 88 голосов было подано на листу карпаторуску, 37 — на листу Волошина, а 7 карток подано чистых. Картки поданы на листу карпаторуску спалено.

В Лялеві подано на карпаторуску листу 117 голосов, на листу Волошина — 121 голосов, а чистых карток — 124.

В Пистралові 70 голосов пало на листу карпаторуску а лем 30 голосов — на листу Волошина. Помимо того в официальном комунікаті подано, же „80% голосов отдано на листу Волошина“.

В Йогараші отдано 145 голосов на руску листу, 40 голосов — на листу Волошина, 26 карток чистых. Официально оголошено: „216 голосов на листу Волошина“.

В Залузі 338 голосов отдано на руску листу, а лем 47 голосов на листу Волошина. Официально подано, же на листу Волошина отдано 373 гол.

В Романцевичах на руску листу голосовало 325 людей, а 4 голоса достала листа Волошина. Официально подано, же листа Волошина достала 198 голосов.

В Яблоніві руска листа мала 235, а список Волошина 7 голосов. Официально оголошено, же на список Волошина отдано 211 голосов.

Карпаторуска листа не была признана Волошином. Помимо того люде масово голосовали на тоту листу, або отдавали чисты картки. Робили тото помимо великого террору и натиску со стороны волошинцов. Во

всіх выберательных пунктах были высланы гонцы, котры мали приказ ревизовати голосящих и отберати им картки с рускыма кандидатами. Кромі того Волошин выдал тайне заряджене относительно того, яке число голосов отданных на листу Волошина мае опубликовать каждая комиссия.

В місцевости Гандеровицы агенты Волошина нашли при одном хлопі картки с рускыма кандидатами и збили его до утраты сознания. За тото само збили волошинцы хлопа с села Яблонково, а в селі Нове Давыдково ческа жандармерия арестовала Дудашеву за тото, же роздавала знакомым картки с рускыма кандидатами.

Ище перед выборами арестовано: Костяка, Собку, Ковача, Романица, Добра и Талабишку.

Так выглядят свобода в автономной „Карпатской Украині“ и христианска любовь ближнего отца **Волошина**.

При такой свободі „выборы“ выказали, же на Прик. Руси мают перевагу украинофилы, бо на инших не позволено отдавати голосов, а если помимо того, ктоси отдал голос на русских кандидатов, то тоты картки палили, або нищили, а официально оголошено победу волошинцов.

На Балканах творит ся новый политычный блок.

В понеділок дня 20. лютого распочал в Букаресті обрады с'їзд представителей балканских держав, в котром приняли участь министры заграничных справ Югославии, Греции, Турции и Румынии. Конференции той приписуют велике политычне значене, особенно в виду подчеркиваемых безустанно через берлинску пропаганду экспансийных плянов относительно Балканов, где в послідном часі проявляют ся также влияния англички.

Головна задача той конференции ест проба втягнути до Балканского Бльока Болгарии, бо втотчас тот блок числил бы около 60 миллионов людей. Была бы то сила, могуча успішно протиставити ся забеганкам Німеччины

и парализовати всі ей пробы накынати свою гегемонию на Балканах.

Кромі того призадували ся на той конференции, чи не дало бы ся втягнути до бльока Мадярщину, бо и тот факт вплынул бы користо на консолидацию отношень в той части Европы.

Премер грецкий и министр заграничных справ ген. Метаксас вступил по пути на конференцию до Білграда и там отбыл наряды с югославянским премьером Цветковичом и мин. загр. справ Марковичом. На конференции той пришло до полной солидарности всіх партнеров в справах обороны интересов балканских держав.

Паперова наука в школах.

Знана то річ, же теперешна школа сельска ест мало звязана с житем на селі. Через много літ молодеж учит ся рижных часто не потребных предметов. Бесідуе ся дітям о том, кым был Нерон и Ганибаль, а не заикне ся никто о том, што же хлопца на селі, як доросне, не учит его никто ани словом о кооперации и о рациональном веденіи сельского господарства.

Задача школы, то не лем умственный развой молодежи и наладоване до ей голов якои скількости загальных відомостей. Школа народна — особенно на селі, где діти звичайно на ней кончат свое образование — музит приготовить молоде поколіне до життя. Музит познакомити его с трудностями и усло-

виями, в яких молоде поколіне в будучности буде жити, трудити, и розвивати ся.

Прото тыж небезосновны сут жаданя многих кругов, штобы в школах сельских введено также науку о веденіи сельского господарства, годовлі домашних звірят, пасічництві, садоводстві и т. д.

Вмісто робити в школі вирізованкы с паперу, чи не користнійше было бы запровадити діти до стайні и показати им, як належит дбати о чистоту худобы и стайні, або в саді научити их чистити и плекати дерева овочевы.

При каждой праві школі ест поле, котре можна поділити на маленькы грядкы. Каждая дітина достае свою грядочку, на котрой учит ся управы рослин и готовят ся до буду-

чого життя на селі. Таким способом молодеж учила бы ся любити своих землю и роботу на ней и дознала бы ся, же прирост продукции рольной, то найпростійша дорога до материального поднесения села.

С другой стороны в школах сельских аж и предметы загальны повинны быти достосованы до місцевых потреб.

Як приходит до хлопа якеси писмо с уряду, хоче он, штобы ему сын „отчитал — бо преця по то ходит до школы“. Тымчасом сын, если и отчитат писмо, то его не розуміе, ани не знае, што с ним зробити, бо за мало знае о податках и обовязках гражданина в виду державы.

Таксамо за мало учит ся его обчисляти процент, кубатуру дерева кантового и округлого, шо найчастійше учит ся тых наук теорытично, не вяжучи их с житем сельским. Прото тыж часто старше поколіне оттігат ся от школы. Треба тому зарадити через зміну програм науки. Треба стреміти, штобы школяр в высших клясах уміл обчислити точно всі доходы и расходы в сельском господарстві, знал свойства штучных навозов, уміл плекати овочевы дерева, уміл ховати рационально домашный скот, потрафил дешево осубити свое поле, загосподарити неужиткы, поправити пасовиска и луки, знал организацию громады, гмины, повіта, кооперации и т. д. и уміл написати просьбу до уряду, иншими словами, штобы знал, які права и обовязкы прислужуют каждому гражданину.

При такой организации школа на селі звяже ся тісно с потребами села, стане ся користна и напевно повитат ю щиро населене.

Чи дали вы уж лепту на зимову помоч для безработных?!

Весняны роботи в поли.

Тогорочна зима была легка и уж тепер маме праві совсем весняну погоду. Если так дальше буде, то незадолго треба буде вытягнути плуги и бороны и распочати весняны работы.

Дбачий газда уж тепер направят рольничі знаряды, штобы, як обсохне земля, не змарновати ани одной години дорогого часу. О бо на правду час на весні ест дорогой и каждое опоздане засіву може нераз спричинити великы втраты. Запобігливый газда дбае уж также тепер о того, штобы мати дост доброго и чистого зерна до сіяня. Сіяти треба лем зерно полне и чисте, котре каждый повинен приготовить в зимі, бо лем с такого зерна можеме надіяти ся добрых урожаев. Кто посіе зерно планне, тоньке и засмічене, тот най ся не чуде, як увидит пак на поли голы пляцы, зарослы лем буряном и полно всіяного зельска і зерні, бо што посіят — того мае. Зле отже робят всі тоты, котры завчасу не старают ся о добре чисте зерно досіяня, а в послідной хвилі, як уж поле заоране, вступають до першого ліпшого skleпу и там купуют якебудь зерно — таке, яке ест в skleпі, вывозят его на поле и ним засівають свою ниву. Практику таку встрічае дост часто в наших горах и не дивота, же пак в літі газда плаче и нарікат, же на грунті выросли буряны, же зеренце ест на палец високе, а притом одно уж покорчило ся, а друге ище зелене.

Если бы газда лем кус над тым подумал, то сам пришол бы на того, чом го така біда присіла. В skleпах, где мы купуеме зерно, нит праві николи зерна на засів, а ест лем зерно до ужитку для людей и худобы. Найчастійше зерно ест зберане, бо купец купуе его в малых партиях от рижных людей и через того сут там гатунки вчаснійши и позднійши. В зерні таком ест слаба сила прозябаня, сходит рідко и дозріват в рижных терминах, але зато панюшат ся там осеты и бурян. При засіві поля таким зерном мае газда лем втрату, а користи николи мати не може.

Газда мусит собі запам'ятати одну святу правду. Не сіяти зерна за дуже, лем тилько, килько мае он доброго, чистого зерна о великой силі прозябаня и сіяти его на грунті добро обробленом, пульхном и належито спрогноеном. Не мае газда в том році спрогноеного достаточно всього поля, най сіе меньше и то лем на фалатках спрогноеноых. Решту най оставит на толоку, або най засіе зеленыма прогноями, як лубином и инши. Най ся не боит, же буде мати меньше хліба, бо хліб зародит ся ему ліпше и выстарчит его на всі домашны потребы. Зеленыма прогноями знавозит он решту грунту и на другой рок може надіяти ся ліпшой вроды, а если оставит часть поля аж и на толоку, то буде мати яке таке пасовиско для худобы, а засіваючи планним зерном яловий грунт, не буде мати ани пасовиска, ани хліба.

Ниву треба обробити старанно. Орати найліпше и найкористнійше ест в осени под зиму, але кто в минувшом році в осени того не зробил, мусит тепер орати. Орати належит возможно найглубше, але робит ся того постепенно, бо если бы отраз в одном році по плиткой орці, поорал кто поле барз глубоко, тот не може надіяти ся добрых урожаев, бо выорана на верх мертвица зашкодит належитому розвитку посіяних землеплодов. Хотучи поглубити верству управной почвы, належит каждого року запусчати плуг чим раз глубше, аж осягне ся потребу глубину почвы.

При ораню на весні треба сильно уважати на того, штобы нива втратила як найменше вохкости, штобы вітер и сонце не высушили занадто скыб. До прозябаня зерна ест потребна вода и тепло. Если отже в ниві нит вехкости, втотчас много засіяних зернят може не посходити. Таксамо кореникы молодой рослины потребуют вохкости, бо они могут брати кормовы складники с землі лем втотчас, коли они сут розпущены в воді. Порушана глубоко через оране почва стае ся продувна и высухат скоро, што нераз приносит великы втраты. Прото поради́йше ест орати поля восени, але кто оре их на весну, повинен того зроби́ти як найвчаснійше, штобы молоды рослины могли ся розвинути, покаль земля ест ище достаточно вохка.

Не мале значене для урожая мае мае сам сів зерна, при котром тратит ся у нас барз дуже хліба. О сіві напишу в слідуючом числі.

ПО ЛЕМКОВЩИНІ.

Ліщини, то невеличке село в лемковских горах пов. горлицкого. Нит до него доброго доступа с жадной стороны, але помимо того знають ліщиняв люде праві цілов Польщи, бо наш хлоп талантливый и трудолюбивый. Он уж родит ся натурастый, а як лем кус поросне и як мае яких 15—16 літ, то уж бере ся в світ с рижным деревяным и різбарским товаром и торговльом добыват собі добробыт и помоч в господарстві. В селі всі хаты сут покрыты цынковым бляхом, в хатах ест чисто и пространно, а весь фонд на устройство будынков тягне село с торговлі. **Може кому** вдавати я тота торговля мизерна, але мы ньом дорожимо, бо она нас ратуе. До войны іздили ліщиняне со своим товаром найчастійше на Мадяры и доходили до Кошиц, Угеля, Ужгорода, Арада и дальше, а тепер ограничат ся их торговля до границ Польщи. Іздыт они по великих містах, як Варшава, Лодзь, Краков, Познань, Гдыня, Гданск, Катовицы, и инши и зарабляют значны гроши.

Торговля тота мае и другы также користны для села стороны. Люде, іздычи по світі, видят, як жие світ и учат ся в нем неодной доброй річи. При своих іздах познають вартость науки и переконують ся, же наука ест конечно потребна и же не выстарчит скончити школу, але учити треба ся ціле жите. Тоты люде не могут уж жити без книжки и газеты, бо они уж до ней привыкли. Они стали ся больше товариски и хотячи сходити ся также у себе

Загальне Собранє членов чит. им. Качк. в Ліщинах.

Дня 29. січня 1939. отбило ся в Ліщинах дорочне собранє членов читальні им. М. Качковского.

По докладі о діяльности уступаючого выділа, о котрой уж написано выже, обще собранє уділило абсолюторию и признательность председателю и членам выділа и выбрало нове правлене, до котрого вошли: председатель Теодор Файфер, заступник председателя Осиф Ющак, секретар Иван Карляк, касиер Владимир Обшарский, библиотекар Василий Крыловский, заступники: Игнатий Хованец и Гавриил Обшарский.

До Контрольной комиссии были выбраны: Теодозий Чергоняк, Лука Чергоняк и Михаил Павлик.

Всі члены нововыбраного выділа знаны сут в селі с культурной діяльности и дают поруку, же читальняну роботу розвинути успішно и осягнут намічены ціли. Счасть им Бог в доброй и користной для Народа работі.

М. Рончковский.

в долги, замовы вечеры, коли по обіздах всі повернули до хаты, основали они в р. 1938. читальню им. М. Качковского.

Початкы основаня были тяжкы, бо не всім ся того подобало, многы были тому противны и повстала меже читальняками и противниками незгода и роздор так, же основатели читальні сами почали жаловати, же ю основали. Але поволи втихло в селі, наступила згода меже старшима, а особенно меже молодежом и тепер молодеж взяла ся сильно за культурну роботу в селі. Не минул ани оден род часу, а уж паробци организовали при читальні аматорский кружок, вчат ся представлень, котрых отограно уж пару в своем селі, а с одним представлением: „За сиротою, Бог с калитою“ **выіхали они до сусідного села Білянкы**, где их добра гра не лем подбила сердца білянчан, але принесла не злы доходы для читальні с билетов входа. Оживлена діяльність выділа и аматорского кружка вплинули користно на противников читальні, бо тепер нит ани одного человека в селі, котрый бы относил ся до ней ворожо.

На „Щедый Вечер“ наши паробци заколядовали также красны грош для читальні и як так дальше буде, то за який рок часу приступиме до будовы власного читальняного дому и покажеме другим селам, же мы уміеме постояти за свое добро.

Иван Рончковский.

800 миллионов фунтов штерлингов перешначат Англия на довооруженє.

Парламент англицкий ухвалил перешначити 800 миллионов фунтов штерлингов на военны ціли. Ест то так велика сума, котра соже захвяти бюджетну равновагу аж и так богатой державы, яком ест Англия. Англицкий премьер Чембелен сказал, же если державы и в будущем будут вооружати ся на выбіжкы, то мусит дойти до полного банкротства всіх европейских держав.

В дальней части своей бесіды Чембелен заявил, же если бы вірил, же конференция

в справі ограничєня вооружєня даст добры розультаты, то постарал бы ся скликати безотложно таку конференцию. Однак така конференция при теперешном заогнею политычного положєня не дала бы пожаданных розультатов.

Оставила 400 потомков. В місцевости Кординияно в Италии померла женщина, числяча 102 roky. Остало по ней около 400 дітей, внуков и правнуков.

Што чути в світі і в краю

Німеччина прийме польських робітників на сезонні роботи. Дня 3. лютого підписано в Берліні договір польсько-німецький о сезонній еміграції до Німеччини. Договір тот регулює справи виїзду, побыва і платні для робітників с Польщі, які выйдут на літо т. року.

Италия не хоче офіцерів - жидів. Офіційна італійська газета оголосила декрет, на основі котрого мають бути усунені с армії італійської всі офіцери-жиди. Офіцери-жиди не тратят права до емеритурі и задержують офіцерську степені.

7-ох арабів засуджено на кару смерті. Суд в місті Наіфі в Палестині засудил 7-ох арабів на кару смерті за того, же носили они безправно оружие и ставили оружний отпор англицьким властям.

26 мамутов найдено на Сыбири. В полночной Сыбири при устью ріки Лены найдено кости 26-ох величезных мамутов. Тіла тих допотопных звірят перележали тисячі літ под прикритом леду и снігу. Последне літо, ненормально тепле на Сыбири, отслонило их кости.

250 овець скочило в пропасть. В испанских Пиренеях мал місце незвичайний випадок. С незнаних причин баран, идучий на переді кырделя овець, настрашил ся и скочил в пропасть. Идучих за ним 250 овець пошло его слідами и всі они зробили так само. Пропасть была глубока и всі овці убили ся.

Продавали мясо с сусідів. В окрестности золотодайных теренов Кильо-Мото (Бельгийске Конго в Африці) выкрыто парусот случаев убийств.

Слідство выкрыло, же убивала муринов и білих одна сусідна секта мурина, котра тіла убитых людей будила, краяла и продавала на торгах на вагу, як звичайне мясо.

Власти арестовали понад 200 муринов.

И такє ся трафит пияком. В Быдгощи при-трафил ся смішний випадок. Над ріком Брдом найдено одеж мужчини. Насувало ся підозріне, же ктоси в намірах самоубийственных рособрал ся и шмарил ся до воды. Дали знати полиції, котра нашла в одежі документи, на основі котрых ствердила, же одеж належит до поважного и знаного жителя Быдгощі, жиючого при ул. Поморской. Полициант пошол до мешканя мнимого самоубийцы, штобы повідомити жену. Тымчасом показало ся, же „самоубийца спит собі найсмачніше в постели“.

Был он попередного дня на забаві с камратами и видно так собі подпил, же зробило ся ему горячо на дворі. Прото тыж знял одеж над ріком, а сам пошол до хаты спати. Счудовал ся он немало, як ему сказали, где ест одеж, бо нич не памятал.

Найстарший плуг на світі. В музею в місті Ганновер в Німеччині находить ся плуг (соха), котрый має по обчисленням ученых перешло 5.000 літ. Плуг тот найдено в торфовищу коло місцевости Аврид в Німеччині. Плуг тот уважають за найстарший на світі.

Копина — то великий присмак для муринов. В городской різні в Грудзьоадзу убивают масово коні, котры скупуют с цілого Поморя. В січні т. р. убито там 285 коней. Конину высылают в зимі до Бельгии, где перерабають ю на консервы и высылают до Конго Бельгийского в Африці. Там купуют тоты консервы мурины, котры уважають конину за великий присмак.

Затруте мясом. В кобынском повіті занотовано случай масового затрутя мясом. На весілю у одной газдині по сідженю мяса захворіло сейчас 39 людей с отзнаками затрутя. 4-ох с них отвезено до шпиталю, а решті уділил першой помочи місцевый лікар.

Газдиня купила мясо у місцевых різникова-жидів и мясо не было стемпльоване. Задержаны різники признали ся, же мясо походит с худобы, зарізаної дома без оглядин ветеринарийных и же не было совсем свіже, прото продали его по низших цінах. Різников арестовано.

Хотят воду тамовати водом. Нераз трафят ся, же в плаваючом по морях кораблі повстає дыра в боку або на дні корабля. Дотепер старали ся таку дыру якнайскорше забити, або залатати. Але того не все ся удавало и для корабля не было уж ратунку.

Тепер учены впали на инший способ. Вынашли они машину, котра вытварят 35 градусов зумна. Така машина в барз коротком часі замінят воду на лед, котрый засклепит дыру и пароход може сміло продолжати свою подорож до пристани або до реперацийного доку.

В минувшом році зробили пробу с том машином на озері Цурыхском. Опустили они машину на дно озера и зараз вода почала замінятися на брылы леду.

Волокно с натины картофляной. Т-во фабрикаций штучного волокна в Саксонии, по долгих досвідах, вынашло способы одержаня с натины картофлей штучне волокно, подобне до льняного прядива. Пробы дали добрый результат и комисар 4-літнього господарства пляну затвердив проект будовы в Турингии специальной фабрики прядива с натины. В осени того року мають селяне достарчити потребу той фабриці суху натину.

Шимпанс грає в бильярд. Оден властитель цирку в Нью-Йорку має малпу (шимпанса), котру научил грати в бильярд. Малпа присвоила собі так добре правила гри, же в конкурсі, сорганизованим через властителя, ограла его, одержуючи 109 пунктов переваги над чоловіком. Властитель цирку перенял ся так сым, же от того часу перестал грати в бильярд.

Нове експлозийне средство. Нове експлозийне средство о великой выбуховой силі вынашол естонский хемик. Средство отличат ся небывалом розрываючом силом, а так же и тым, же при перевозеню має быти цілковито безпечно, а в часі ужития не дає нияких газов. Прото може оно мати велике применене в копальнях.

Кричачи течки (торбы). В Америкі нападають часто на переходячих людей бандиты и вырывают и мс под пахы течки. Робят того втотчас, як сподівають ся найти в течці гроши, нападають отже звичайно на банковых урядников.

Штобы ся охоронити перед тыма нападами, вынайдене там патентованный замок, котрым замыкат ся течку. В замку том находить ся механизм, котрый выдає з себе алярмовы звуки, подобны до свисту сырены, если ктоси, не знающий механизма, хоче отворити течку. Через введенне такого механизма перед зма місяцями, удало ся перешкодити около 100 крадежам.

Вынаход американского инжинера стал ся голосным за океаном и введено его кромі Америкы так же в Канаді, в гдеяких провинциях Америкы Полудневой и в Австралии.

Продам цілу добре загосподаровану пасіку в Крыниці-Селі, або поодыноки улии.
Голосити ся: Мгр. Яновицка
Крыница 2.

Прийму ковальского челядника ознакомленого добре с кутем воев и плугов. Плата ведля умовы.
Голосити ся писемно, або устно:
ПЕТРО ПАСТЫРЧИК
почса Лосе
село Климковка.

Комунальна Каса Ощадности Повіта Краковського в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

О т д і л е н я : К Р Ы Н И Ц А, тел. 112.
В Е Л И Ч К А, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.